

東華續錄

光緒一百三十二

臣朱壽朋敬編

臣潘鴻鼎恭校

光緒二十二年丙申春正月丁酉朔丑刻 上詣 奉先殿行禮寅刻詣 堂子行禮辰刻詣 慈寧宮

行禮 御中和殿受禮太和殿受賀已刻詣 大高殿 壽皇殿行禮午刻入宗親宴○戊戌 上詣

慈福端佑康頤昭豫莊誠壽恭欽獻崇熙皇太后前請安○己亥諭董福祥奏遵查營官官功邀獎據實覆陳一摺營官王正坤前因帶兵駐守積石關拋棄餉械移紮白塔寺圍困康達被圍坐視不救經董福祥查明奏參降旨革職茲復據該提督將該革員續被參奏各款確查覆奏王正坤雖無暗嗾回匪圍攻康達實據惟以覆敗之將猶敢冒功邀賞實堪痛恨僅予革職不足蔽辜王正坤著發往新疆効力贖罪以肅軍紀而儆效尤○辛丑董福祥奏奴才以西甯解圍含糊收撫賊未懲創焚掠如故於十一月二十八日消本月初十日等日曾將大概情形具摺並電致軍務處代奏在案奴才以巴燕戎之圍既解甘都堂等處雖有負隅土賊而較之西甯則勢敵較微不能不權度重輕先其所急因飛檄何得彪馬步四營星夜開赴西甯並令與辦事大臣同城鎮道和衷商酌力挫兇鋒切不可附和收撫致貽滋蔓旋據稟報

於十一月二十九日抵西甯分紮西門外及城上查南北西三門緊閉依舊東門東關一帶賊卡林立儼然對壘郡城四面距數十里之南川營喇謀營哆吧實惠溝北川等處以及大通縣城圍攻掠幾無虛日百姓告急求救之呈詞紛紛而至僉云較城東解圍時禍亂益亟十二月初一日探得賊衆數千手執良民旗幟蜂擁而來意圖撲城何得彪會同西甯鎮鄧增各出隊伍馳禦於距城二十里之西杏園地方交鋒獲勝斃賊數十當日暮收軍仍紮西甯城外次日多派探騎察看賊勢查得南川申中之賊與東北壘山之紅牙壘東溝灘馬家灘羊毛溝等處各賊巢聲勢聯絡同惡相濟故西南四五里之都司營城久圍不解申中之賊殺盡該處漢民占距五堡傍谷依山溝坎紛歧東至丹麻紅水泉接連沙溝樹兒溝一帶之賊分外強悍圍攻民堡殺掠更烈何得彪商同大臣奎順西甯鎮鄧增定於初四日出隊往攻賊巢何得彪帶所部營官丁際清洪瑞步隊三營并孔高明永興馬隊一營各出六成隊伍與奎順鄧增之防練馬步各隊同時馳抵申中賊壘該賊每堡皆有礮樓四座礮眼密排又鎗埋伏堡外拒守甚固各軍步隊環而攻之礮樓內礮發如雨我軍雖有傷亡無一怯退者正圍攻間忽援賊千餘從兩溝出我軍分隊迎擊鎗斃百餘賊斬馘十七級該堡賊披髮裸身開柵撲出我軍馬步夾攻又鎗斃百餘斬馘十四顆賊敗入堡死守我軍日暮收隊逼近駐紮初五日何得彪所部及奎順鄧增各軍皆告奮勇再往攻圍梯衝互

進鎗礮齊施鄧增自發開花大礮轟倒礮樓各軍乘勢擁入遂破堅巢其餘四堡之賊依然負隅初六日
何得彪約會奎順鄧增之軍乘勝往攻四堡之負傷死拒者皆與申中相埒正酣戰間礮子忽中何得彪
右股當用利刃剜出鎗子血流至足不絕鼓音初七日何得彪裹創督隊與各軍趨過山腰連將紅牙壑
東溝灘馬家灘羊毛溝四處賊巢一律搗毀堡寨內外賊屍枕藉約有二千斬逆首苗牙古馬拉辛二名
查點我軍陣亡弁勇十名帶傷弁勇五十七名是役也鏖戰四日破巢五處都司營城之圍頓解南路亦
通此初一至初七日各軍力戰獲勝之實在情形也郡城勇敢之將當推鄧增爲最何得彪奮不顧身帶
重傷後猶復連日血戰實爲異常出力各營弁勇執戈前驅爭先恐後者尤爲指不勝屈實由仰仗 天
威感激 養育故將弁士卒皆知同仇敵愾不受逆賊欺罔而於數月之間連破堅巢力遏狂猷也已飛
檄何得彪等趁此軍威大振時約會郡城諸軍同心合力一鼓作氣必使元凶授首餘孽淨除全境一律
解嚴以期仰慰 宸廑 上諭董福祥奏派援西甯諸營攻克賊巢一摺前因西甯城圍緊急逆勢披猖
經董福祥派何得彪馬隊四營前往援剿嗣後城圍雖解逆黨未經懲創仍復恣意剽掠上年十二月初
一日何得彪會同西甯鎮總兵鄧增各處隊伍在西杏園地方接仗獲勝初四初五等日出隊往攻由中
堅剿殺初六初七等日何得彪身受礮傷裹瘡力戰連破紅牙壑東溝灘馬家灘羊毛溝四處賊巢斬賊

首苗牙古馬拉辛二逆都司營城之圍頓解南路亦通剿辦尙屬得手仍著董福祥飭令何得彪趁此軍威大振之時約會西寧各軍一鼓作氣務使元惡授首餘孽淨盡用副朝廷綏靖地方之意○壬寅祈穀於上帝○上詣慈福端佑康頤昭豫莊誠壽恭欽獻崇熙皇太后前請安○癸卯以任道鎔署河東河道總督○諭軍機大臣等李秉衡奏河臣到任時所有黃河來歲應用料物預爲儲備堤埝緊急工程擇要修培一摺東省河工極關緊要仍著責成該撫將應行修培之處趕緊興修務臻穩固○諭前據依克唐阿奏參奉天候補道余濬等貪縱酷虐各款當經諭令李培元確查具奏茲據查明奏稱候補道余濬攬權納賄罔上營私准補營口同知陳忠偉貪婪暴虐蠹政害民協領英凱依附余濬耗帑勞兵證諸卷宗參之輿論該員等被參各節均屬實有其事請旨懲辦等語奉天營務吏治久形廢弛若不將該劣員等從嚴懲處何以挽積弊而資整頓余濬陳忠偉英凱均著卽行革職永不敘用○諭上年湖南長沙衡州二府所屬州縣被旱業准截留漕折銀二萬兩預備平糶續據陳寶箴奏稱長沙府屬之醴陵攸縣茶陵衡州府屬之衡山耒陽清泉安仁寶慶府屬之邵陽等州縣均經被旱成災在大分以上輕重不等甚有顆粒無收之處其瀏陽湘潭湘鄉新化各縣被旱較輕收成亦屬歉薄所種諸豆雜糧又因霜霰太早損失過半至澧州及安鄉縣並岳州常德二府所屬之巴陵華容龍陽沅江等縣被水浸淹現已飭屬

分別查勘並將被旱之醴陵等州縣懇恩接濟等語卽著該撫飭屬將賑撫事宜盡心經理並查明被水被旱成災輕重將應完錢漕分別奏請蠲緩其被旱較重之醴陵攸縣等十二州縣除蠲緩錢漕外應如何接濟之處著該撫再行設法籌款妥爲辦理毋任一夫失所用副乘春布關至意○甲辰王文韶奏查開津鐵路修成至山海關上年停工其自關外起至錦州大凌河東岸三百八十餘里工分四段內有墊成土道未布鋼軌者亦有買地未填或已填而爲雨水衝刷者購存華洋材料漸有朽壞現軍事已定若不趕緊接修恐已就之工料日久化爲烏有未成之工段又復基址就湮殊爲可惜臣飭局轉飭津工程司金達詳細查勘估計興修據稱第一段自山海關起至中後所止計程一百二十四里半土工橋墩鋼橋梁有已修成者約尙須銀三十餘萬兩九箇月可以告竣第二段自中後所起至高橋止計程一百五十七里半僅買地基未盡布置約需銀一百五十七萬餘兩一年半可以成妥第三段自高橋起至錦州止計程五十四里土工間有完竣橋墩橋梁尙未動工其間由高橋至沿海之天橋廠二十一里暫置鐵軌以運海道購來之材料現亦稍有損壞約需銀六十三萬餘兩一年可以告成第四段自錦州起至大凌河東岸止計程四十九里半所修土工與第三段相似其餘均未布置約需銀九十五萬餘兩以上皆指從一段辦起而言若兩段同時興作則一年半便可開車一段辦起須三年餘方可開車至所估銀數

員司薪水等項尙不在內等情臣覆加查核四段共需銀三百四十餘萬兩爲數雖鉅均係應辦之工且其間已築土道若不安置鐵軌一氣呵成勢將日益坍塌勞費更多擬請自開春冰泮後先將地段趕緊修築所需銀三十餘萬兩由北洋就地籌借以免部臣籌撥其餘三段應如何辦理來春體察情形再行通籌請 旨下所司知之○乙巳時享 太廟 上親詣行禮○上詣 慈禧端佑康頤昭豫莊誠壽恭欽獻崇熙皇太后前請安○張之萬因病奏請開缺不允予假兩月調理○丙午 上詣 慈禧端佑康頤昭豫莊誠壽恭欽獻崇熙皇太后前請安○上御紫光閣賜蒙古王公筵宴○戊申 上詣 慈禧端佑康頤昭豫莊誠壽恭欽獻崇熙皇太后前請安○以 皇太后駕幸頤和園 上詣瀛秀園門恭送○己酉以邵積誠爲貴州布政使文海爲貴州按察使○李鴻章奏臣奉 命赴俄致賀並往德法英美各國聘問 特派頭等出使大臣 朝廷慎重邦交禮意崇隆爲前此所未有此此外如荷蘭比利時各國聞臣奉使均來請便道詣其國都臣與總理衙門籌商各國皆有交涉事件自應加意聯絡至各邦新政商務凡有益於 國者均須隨時隨地認真考究庶無負 特遣專使之意亦以慰殊方嚮慕之忱道遠事務繁需才任使應慎選深通西學能知大體及熟諳西國語言文字品行端潔足備繙譯之選者隨同前往以資臂助謹就平日所知分別調派酌定員數繕單恭呈 御覽如不敷用隨時奏明續調所需經費照

奏定章程核實開支卽在江海關出使經費項下提撥咨明總理衙門查核得 旨如所請行○李鴻章奏據總稅務司赫德面稱因臣遠役外洋雖帶有熟悉洋情之華員似須生長是邦者爲之鄉導以備隨時顧問俄使喀希尼亦請酌帶俄員現充稅司者就地照料更昭妥協查有五品銜副稅司柯樂德係俄國人二品銜稅司德璫琳係德國人三品銜稅司穆意索係法國人花翎頭品頂戴稅司赫政係英國人三品銜稅司杜德維係美國人以上五員効力多年均通曉中國語言文字品行端正臣與赫德商酌暫作爲參贊官令其各至該本國伺應其應領月薪仍由新關照舊支給毋庸在出使經費項下開支所有路費店費一切雜用准其開報除咨總理衙門並分行知照外謹附片具陳得 旨如所請行○庚戌

上詣 奉先殿 壽皇殿行禮○諭軍機大臣等前據工部議覆御史胡景桂奏請將山東河南兩省河工變通辦理山東黃河一切事宜巡撫兼轄已久現在李秉衡業經撥款購料妥爲修築至河南七廳修守工程現在春汛屆臨正關緊要任道鎔仍著馳赴河南將現在應辦工程認真經理河督移駐濟甯有無窒礙究竟兩省河工應否酌量變通之處並著任道鎔體察情形通籌全局奏明辦理將此諭令知之○諭軍機大臣等據董福祥奏崔嶽所帶回勇從未出力卽其教下人亦謂其居心叵測近又散布謠言惑亂兵衆以致西甯愈加戒嚴請飭裁撤等語回情狡詐異常崔嶽所部既不得力又復造謠惑衆自應

卽行裁撤惟西甯逆敵尙張此項回勇遽行遣撤句結滋患亦不可不豫爲慮及應如何妥爲遣散之處
著陶模體察情形斟酌辦理毋致別滋事端是爲至要將此由四百里諭令知之○辛亥 上詣 大高
殿 壽皇殿行禮○上御保和殿賜蒙古王公筵宴○上幸頤和園詣 慈禧端佑康頤昭豫莊誠壽恭
欽獻崇熙皇太后前請安○壬子 上御仁壽殿賜廷臣筵宴○欽奉 慈禧端佑康頤昭豫莊誠壽恭
欽獻崇熙皇太后懿旨著於二十日派那彥圖帶領年班蒙古王公詣頤和園請安○諭譚繼洵奏特參
不職營官等語湖北管帶武剛中營副將李中發當該營裁撤時未能妥爲彈壓以致勇丁鼓噪其平日
紀律不嚴已可概見李中發著卽行革職以示懲儆○癸丑戶部奏光緒二十一年十一月初十日內閣
代奏中書劉鐸條陳茶政一摺又是月二十九日 臣部代奏戶部員外郎陳熾條陳茶政一摺均經軍機
大臣面奉 諭旨著戶部議奏欽此欽遵由軍機處先後鈔交到部查內閣中書劉鐸原呈內稱自洋人
通商以來海外悉索華茶而華人獲利者少折本者多何哉產不一區銷無定所其弊一茶品不佳費本
甚重其弊二公所雖設並無市規其弊三華商不認真置貨坐使利源盡失其弊四當茲積重之時而圖
挽回之策斟酌損益謹擬切要條文數端一頒茶照浙江安徽江西湖廣五省折衷照數不准溢額先由
各省釐金總局交課給單辦茶釐金局卡俟茶成箱驗單呈樣酌本估值抽收釐金一設茶政局漢口爲

各省通衢宜設茶政局五省茶箱起運釐局按月造冊咨送茶政局凡茶到漢抽驗核價合十字爲一批以到埠爲先後不得越銷一設茶葉公所洋人愛磚茶宜由局製定模式頒商仿造每歲孟春由各省公所會萃眾司整飭購求等語又查臣部員外郎陳熾原呈內稱中國茶務昔盛今衰其故有三一則印度日本之仿種太多一則洋商之抑勒太甚一則山戶與商人互相忌嫉據價屠奇敗壞市面茶務之江河日下至於今日補救無從雖然有四法焉可以枯吹生一曰參用機器人工炒焙不能無優劣粗細之殊惟參用機器烘製火候均勻物皆精美宜令各關道酌提款項選舉中國茶師密赴印度考驗製法購機入山製造壓磚機器潯漢已有十家亦先購一分入山以佳茶試辦二曰准設小輪婺源寧州茶船須渡鄱陽湖南之茶須渡洞庭茶市屆期阻風一二日後到之貨多受西商抑勒宜令各商在鄱陽洞庭置輪拖帶或由官設立酌收其資然後茶船不致後期行旅咸占利涉三曰設立公棧茶商運茶至埠中國茶棧皆逼窄不能容宜令江漢關道曉諭商棧設立公棧務極寬大可容數十萬箱茶船至埠皆運存公棧不准一箱先入洋行議價時可由吾操縱四曰暫減釐捐西人之喜用印茶者貪其價廉耳印茶之廉由於參用機器者半由於不徵稅鈔者亦半華茶則稅鈔不能議減釐捐方且議增是驅之用印茶也今出口稅及子口半稅關係洋息未敢輕議減收至於內地釐金及各項山捐箱捐膏堂捐外銷款項均請

一律暫減三成等語臣等伏查中國出口茶數所以大減於昔日固由印度日本諸處大興茶務有以分我之利然茶務如何採其本則在購求採製握其要則在核減捐釐而已臣部前於光緒十六年二月咨覆北洋大臣請減茶釐案內行令各省裁減外銷捐項並令另行籌款應用以爲酌減茶釐地步十七年七月又將江漢關道所覆採茶三事通行產茶省分認真勸導以冀共保利源而各省迄未實力舉行以致茶務日敝茶商日困此誠不可不急爲補救也今內閣中書劉鐸及臣部員外郎陳熾縷陳茶務積弊可謂深切著明所擬辦法亦多可採如劉鐸之請設茶業公所陳熾之請用機器設小輪立公棧減捐釐或爲製茶而設或爲運茶而設或爲鬻茶而設或爲保護茶商減輕茶本而設凡病於茶病於商者皆去之利於商者皆舉之是茶務轉衰爲盛一大關鍵也雖茶釐一項關係京協各餉本難議減然各省果能整頓茶務使採製精良行銷暢旺則出口之茶稅既可暫增而內地之茶釐即可暫減固有不待再計而決者卽劉鐸請頒茶照設茶政局所擬驗貨核價分批挨售並責成釐金局卡收課給單估值抽釐其事皆未免煩苛而竊其所短取其所長則設一茶政局以總司東南各省茶務俾事權歸一呼應靈通亦未始非維持大局之一道也惟茶業公所茶商公棧究應如何設立製茶機器運茶小輪究應如何購製以及茶照可否頒行茶政局可否創設事隸產茶各省臣部無從遙度謹擬鈔錄該中書等原呈請旨飭

下湖廣兩江江西安徽浙江福建廣東各督撫按照該中書等所陳悉心核議切實覆奏分別舉行俟試辦一二年如果確有把握卽將各該省所收茶釐數目奏請核減以成興復茶務之盛舉其各省茶捐外銷欸目應令查照臣部前咨立予全裁毋許延玩總之茶務爲中國一大利源東南數省商民生計所繫各該督撫職司教養固不得淡漠視之任其敝壞而不一爲整頓也得旨如所議行○甲寅諭前據裕

祿奏保道員余濬同知陳忠偉協領英凱才堪任用旋據依克唐阿將該三員奏參當經諭令李培元查明屬實業經降旨將余濬等革職永不敘用原保福州將軍裕祿著交部議處○丙辰上御文華殿美

國使臣田貝俄國使臣喀希尼德國使臣紳珂法國使臣施阿蘭義國使臣巴爾迪日本國使臣林董日斯巴尼亞國使臣葛絡幹比國使臣陸爾業和國使臣克羅伯英國署使臣寶克樂觀見○予故記名提

督劉鶴齡照提督軍營立功後病故例從優議卹戰績交國史館立傳○予故記名提督開缺雲南鶴麗鎮總兵朱從舉照提督軍營立功後積勞病故例從優議卹戰功事蹟交國史館立傳准附祀曾國藩曾

國荃胡林翼各專祠○丁巳總理各國事務衙門奏光緒二十一年十二月二十二日准軍機處鈔交御史胡孚宸奏書局有益人才請飭籌議以裨時局一摺軍機大臣面奉諭旨著總理各國事務衙門

議奏欽此欽遵到臣衙門查原奏內稱京師近日設有強學書局經御史楊崇伊奏請封禁在朝廷

防流弊立意至爲深遠惟局中所儲藏講習者首在 列聖聖訓及各種政書彙售同文館上海製造局所刻西學諸書繪印輿圖置備儀器意在流通秘要圖書考驗格致精蘊所需費用皆係捐貲集股絕無迫索情事所刻章程尙無疵謬此次封禁不過防其流弊並非禁其嚮學尙能廣選才賢觀摩取善此日多一讀書之士他日卽多一報 國之人收效似非淺鮮請 旨飭下總署及禮部各衙門悉心籌議官立書局選刻中西各種圖籍任人縱觀隨時購買並將總署所購洋報選譯印行以擴見聞或在海軍舊署開辦經理既善流弊自除庶於 國家作育人才挽回時局之本心不相刺謬等因 臣等維國勢之強弱視乎人才人才之盛衰繫乎學校古者家塾黨庠州序國學自諸侯以達王畿莫不建學大而德行道藝細而名物象數綜貫靡遺是以人才日盛近世學者往往避實鶩虛舍難就易視西人一技之長一能之擅或斥爲異學或詭爲新奇不知西人之學無不以算學爲隱括西算之三角與中算之勾股理無異同周髀經曰圖出於方又曰方數爲典以方出圖言圖之不可御而馭之以方西人三角八綫之法實基於此餘若天學化學氣學光學電學重學礦學兵學法學聲學醫學文字製造等學皆見中國載籍試取管墨關列淮南諸書以類求之根原具在可知西學者中國固有之學西人踵而行之所謂禮失而求諸野耳泰西教育人才之道計有三事曰學校曰新聞報館曰書籍館英德法俄各國學校之盛或二三萬

所或六七萬所生徒率皆二三十萬人美國學校多至十七萬餘所生徒幾及千萬人學校費用自三四千萬以至八千餘萬不等率由國家及生徒各出其半各國富強之基實本於是是庶政由人才而理人才由學術而成固有明效大驗該御史請將強學書局改歸官辦自係爲講求實學培養人才起見臣等公同商酌擬援照八旗官學之例建立官書局 欽派大臣一二員管理聘訂通曉中西學問之洋人爲教習常川住局專司選譯書籍各國新報及指授各種西學並酌派司事譯官收掌書籍印售各國新報統由管理大臣總其成司事專司稽察所需經費由總理衙門於出使經費項下每月提撥銀一千兩以備購置圖籍儀器各國新聞紙及教習司事繙譯薪水等用核實散放年終由臣衙門奏銷毋庸招股集貲設不敷用再由臣衙門設法籌措如有慕義之士願借鉅款或捐書籍准由司事呈明管理大臣酌定核收至建設學舍地方或假官房或租民宅取足教習各官起居之地兼爲士大夫入觀羣書之所因地制宜妥籌布置該御史所請就海軍舊署開辦之處應毋庸議如蒙 俞允再由管理大臣詳定章程定期開設 上諭總理各國事務衙門奏新設官書局請派大員管理一摺著派孫家鼐管理○戊午 上幸頤和園詣 慈禧端佑康頤昭豫莊誠壽恭欽獻崇熙皇太后前請安○還宮○己未諭軍機大臣等

張之洞奏南洋開濟鏡清袁泰南瑞及福建福靖各兵輪遵旨調防北洋上年十一月間陸續行抵旅順

嗣後煤餉各項運爲難請改由北洋支應等語卽著王文韶查明各兵輪所需餉精煤炭各欸就近按月接支以省周折原摺著鈔給閱看將此諭令知之○庚申加賞通州王恕圖等處粥廠米石○諭軍機大臣等前據工部議覆御史胡景桂奏請將山東河南河工變通辦理當經諭令任道鎔體察情形奏明辦理茲據御史熙麟奏河督必轄全河河南山東不宜歧視請飭另行妥議一摺著任道鎔到任後仍遵前旨悉心體察一併妥籌具奏原摺著鈔給閱看將此諭令知之○諭軍機大臣等有人奏疆臣徇私濫保請飭查撤銷一摺據稱前年湖南武岡州土匪滋事一案前撫臣吳大澂鋪張入告濫保多員經部指駁復以並未與事之候補知府裕慶等捏敘戰功均係憑空結撰且於彙報案內復將其戚曾炳章姓名竄入曾炳章在該撫署內遇事招搖聲名甚劣其餘所保各員亦多不實等語著陳寶箴按照所參各節確切查明據實覆奏原摺著鈔給閱看將此諭令知之○諭御史熙麟奏廕生暨及歲人員會捐道府引見後歸入特旨銓選日久弊生請飭定章程等語著吏部議奏○辛酉 上幸頤和園詣 慈禧端佑康頤昭豫莊誠壽恭欽獻崇熙皇太后前請安駐蹕○不入八分輔國公銜二等鎮國將軍載津卒賞治喪銀一千兩飾終典禮著所司察例具奏○癸亥予故雲南巡撫譚鈞培政績交國史館立傳○諭前據翰林院侍讀學士文廷式奏參江西新淦縣知縣沈壽龍等各欸當經諭令德壽確查茲據覆奏新淦縣知

縣沈壽龍查無得賄情事惟輿論不治人地未宜著開缺另補大庾縣知縣劉光煥因案詐贓查無實據惟赴鄉勘山不知遠嫌致招物議著交部議處蓮花廳同知崔祺信任親友遇事訛索著即行革職代理信陽縣知縣鄭榜詔被參各款均無其事著毋庸置議○甲子雪○上還宮○乙丑祭 歷代帝王廟遣凱泰行禮○王文韶奏續查東征淮練各軍及旅順等處防營歷次打仗所有盛軍陣亡補用副將李明元等一百五十一員名仁字營陣亡升用游擊吳繼盛等十七員名親慶等營陣亡補用參將李志丹等四十四員名拱衛營陣亡補用副將徐自發等二十三員名鞏字營陣亡儘先游擊越章明等四十三員名及在平壤殉難電報學生吳開瑞一名繕具清單懇 恩賜卹下部議奏○戶部總理各國事務衙門奏光緒二十一年十二月二十五日准軍機處片交本日御史王鵬運奏制錢日少銅產日稀請禁止輪船運錢出口並開辦礦務鼓鑄銀圓以維大局一摺欽奉 諭旨著戶部總理各國事務衙門議奏欽此欽遵并鈔錄原奏知照前來查原奏內稱近來京師錢價日貴銀價日賤咸歸咎於私鑄之充斥銀號之把持而不知皆非也其間有大漏卮不可不亟思補救當光緒十一二年間越事初定即有人串同內地奸商以銀易錢裝運出口以致各省錢價陡漲銀價愈低於時乃有鼓鑄制錢之議滇南產銅日少遂不得不購買洋銅日商購去中國制錢將其中金銀提出已數購錢貲本及購銅議起以淨銅售諸中國本

一而息三倍之天下之利孰大於是此次日本索償欸多至二萬三千餘萬彼以一萬萬購錢出口可買盡中國制錢各省禁錢出口獨未查禁輪船外洋不用中國銅錢出口何爲者應請 旨飭下總署通行各口稅務司嚴查充公不得徇縱此節流之法也然利之所在人所必趨雖法禁綦嚴仍將百計偷漏非籌變通之法不足以支危局而開利源其策有二一曰鑄銀圓九州作貢三品兼權周初有九府泉刀始專以銅錢濟用迄今民用繁而銅礦少加以外人盤剝流弊已深乾隆時美洲銀礦大開皆運至中國現銀日多而不自鑄銀錢此何說也比年來中國黃金出口由三百萬增至二千餘萬如不自鑄金錢則國寶全空終受外人挾制應請 旨飭下戶部購買極大機器新鑄金銀銅三品之錢金錢略仿英磅大小銀錢用鄂粵鑄成之式鑄成後頒發各省 諭天下一體通行各省亦一律鼓鑄以資利用仍 特派大臣總理其事惟救急之法則宜先鑄銀錢明春錢價必大漲度購機運京建廠設局約需一年廣東鑄銀局機器甚大每日可鑄銀錢七萬餘圓銅錢七萬餘串應請 飭下戶部先撥銀三百萬兩專鑄大小銀錢運京備用通行各省籌欸運粵鑄錢俟機器到京廠屋齊備卽由京局辦理一曰開礦政中國五金各礦藏地下者不可勝數徒以封禁大利不開比年西士考察及中國土人所知者如川藏之金礦銅礦江西湖南之銅礦金礦煤礦雲南兩廣之五金各礦奉吉之金礦山西河南之煤鐵礦皆以官吏貪圖省事